

# BEMAADZIIG YAAYING MNO-ZHAWENDAAGOZIWIN

Maamwewziying  
niigaan naabying



Naasaab inendamowin miinwaa shki-ii  
waa-ni-izhaang manpii **Baawitigong**

- 05 OOSHME WENJISHING JI ZHICHIGENGIBA
- 07 MAAMWI-NENDWENDAAGWAK WAA-GASHKITONG
- 11 NIIGAAN WAA-ZHINAAGWAK
- 17 AAMBE NI-ZHAADAA

.....

Niigaan Baawitigong aangwaamitaagoziwinan wiindmaagewin

[Futuressm.com](http://Futuressm.com)





# Aapiji go maamiikwendaagwad Baawtigong oodenaawin

*Manpii yaaying  
zhi-mashkowendmomgad*



Naanaawiyiing nda-dinakiimi  
e-maawnji-nishing nbi manpii kina aking —



Nina gaataayiing temgak waasmowin  
enji-zhichigaadeg —



Asin ge ko pagjigaadegiba nda'aami manpii  
Canada ezhnikaadeg aki maawnji-michaag  
meshkdoonmaagewin —




Miinwaa go naanaawiyiing temgak wii-  
bbaa-bmwebshkageng, zhooshkwaagimeng,  
bibbaamseng, bibaamaashing,  
nigaasmoongamgweng miinwaa go  
niibinishiiwigamigeng manpii Giiwedino-kiing —

*Ndaa'aanaanh nendwendaagwag wii-maajiiging, wii-bmaadziimgag gchi-oodenaa, ni'ii dash wii gwa wii aawing owi, aabdeg wii-gikenjigaadeg aanind zengakin gikenjigaadewinan miinwaa aabdeg wii-wiiji-nokiimding maanda go naanh ezhi- ngodoodewaadizing naasaab inendamowin miinwaa waa-ni-izhaang.*

## NONDA AANIIND ZENGAKIN GIKENJIGAADEWINAN:

Giishpin wii-waamdameg ezhnaagwak ndazhiikewininaang, izhaag:

[Futuressm.com](https://futuressm.com)




**Maanda ezhi-mindizang gaawaanh zhinaagwad miinwaa bezhig eta minwewiziwin da-penmandaan.**

E-ko-nsing zhaazhi aanjsijgaademgad maanda Essar Algoma ezhnikaadeg piish go 1992 nso-boongag.



**Gaawii naadmaagemgasnoo manpii ezhnaagwag inaadiziwin, aanjigoziwin aabjikaamgad, miinwaa eshkaam noondaash nchiwag eknoomaagzijig (e-gaachiinjig abinoojiinyag, e-shkiniigijig, miinwaa gechi-gkinoomaagzijig).**

Gaawii naadmaagemgasnoo manpii ezhnaagwag inaadiziwin, aanjigoziwin aabjikaamgad, miinwaa eshkaam noondaash nchiwag eknoomaagzijig (e-gaachiinjig abinoojiinyag, e-shkiniigijig, miinwaa gechi-gkinoomaagzijig).




**Kina bimaadziwin (ganawendizwin, mino-ayaawin, miinwaa gikinoomaagziwin) manpii dazhiikewining dabashiizh temgad piish meno-daapnigaadeg gikinoowaabanjiganing.**

Zaam go naanh niibna gdibnoojiimnaanig zhaawag gkinoomaagegamgong bkadewaad miinwaa gaa'ii niibna giizhiitaasiwag gkinoomaagziwaad.



## NAASAAB INENDAMOWIN MIINWAA IYII NIKEYING WAA-NI-IZHAANG.

**Mii go mbe ji-zhichgengiba gegoo.** Maanda mzinigan gbidnimaagemigad naasaab inendamowin miinwaa waa-ni-izhaang wii-temgak. Gaa'ii wii gwa daa-zhi-ginjgaadesnoo shkwaach wii-aawang, maadaa go naanh wii-maajtaang maanda nikeying:



“*Nindwendaanaanh Baawitigong wii-aawang bemaadziimgak gchi-oodena yaawaad gchi-niibna bemaadzijig 100,000 minik pii 2037 nso-boongak. Gka-debwendmaanaanh Bemaadzijig. Gka-mno-waawiinjigaadaanaanh Yaaying. Gka-zhitonaanh Mno-zhawendaagoziwin.*”

**Gweyek nikeying ka-zhaami wii-mno-mindizyang,** aanwi go aanwi mnik e-temgak nokiiwin, enkiitaagesigwak, wi sa GDP ezhnikaadeg zhoonyaa baangebdeemgag, mno-bmaadziwin, mino-ayaawin, miinwaa gkinoomaagziwin manpii endaajig, ezhi-mno-mindizwaad miinwaa wi sa kina gaataaying eteg aking. Nonda e-ggweji-gashki'ewziwinan zaamendamowag aanind, ni'ii dash wii gwa, gdebwe'endaami aabdeg wii-ishpendamang miinwaa gdazhiikewininaanh maawmweziwin gda'aanaanh wii-gashkitowing wi.

Baatiinwag wenjishijig bemaadzijig, nokiiwinan, minwaa naadmaagewinan tenoon manpii gdazhiikewininaaning zhaazhi ezhchigejig wenjishing. Gaa go gegoo tesnoo ggwedwewin gbeying wii-njitaamgag miinwaa wii-gchi-wiikjitong, ni'ii dash wii go giishpin maamwewziying, weweni naagdawendamang, nakaazying mashkowendamowin miinwaa negjitowiing, miinwaa getnaamendamang, gka-gashki'ewzimi go. Gka-getnaamewzimi. Gka-gashkitonaanh wii-debnamang nendwendmang, wii-zhitowiing gchi-oodenaanh waa-yaawying.








## AANIISH GE-ZHI-DGOSHNANG OMAA?

**Aapji go niibna mashkawiziiwinan daa'aanan  
Baawitigong, dbishko go naanh debendaagozijig  
e-gchi-nokiidangigi-mno-maajiishkaanig  
dwdazhiikewiniwaa.**

Mii dash, maanda Wdazhiikewin Nenaawsidong  
Enkiitmowaad (Enkiitmowaad) gii-zhichigaadeg.




**MAAJIIGING MINDIZWIN  
MIINWAA KINA WII  
DGOSGAABWEMGAG**



**NAANAASAAB KINA GWAYA  
ZHI-GNOWAABMIND**



**MNO-INAANDIZOWIN**



**KINA OMAA ETEMGAG  
GAATAAYING BIMINDIZOWIN.**

## OOSHME WENJISHING JI ZHICHIGENGIBA

Gonda Enkiitmowaad gii-gchi-ganowaamdaanaawaa  
e-maawnji-nokiimgag wii-zhichigaadeg gchi-odenaa  
miinwaa gii-naaknigewag wii-nakaazwaad wi niiwin nikeying  
nkweshkaagewin dazhiikewin maajiishkaatong, wii-dagosdong  
aasgaabwitaagewin wii-maajiiging mindizwin miinwaa kina wii  
dgosgaabwemgag, naanaasaab kina wii-zhi-gnowaabmind,  
mno-inaandizowin miinwaa kina omaa etemgag gaataaying  
bimindizowin.

*Zhiibaa'aamjigaadeg nonda niiwin nikeying nkweshkaagewinan da-chigaade  
e-maawnji-nishing dazhiikewin miinwaa gka-bgidnigonaanh wii gashki'ewziiying.*

## WII-OO-ZHISIDONG

Wii-oo-zhisidong dash, wichigewin Baawitigong zhaazhi gii-daapnaanaawaa waa-nankiiwaad wii-nanaawitowaad aabjitaawin waa-aasgaabwitaagemigag niigaan dazhiike-ozhichigewin.

Maanda ogimaanaang omaa Gchi-oodenaang gii-aanjichigaade miinwaa enji-naadmaageng zhinkaade Dazhiike-ozhichigewin miinwaa Nokiiwi-naadmaagewin, dgoschigaade dash omaa dazhiike-ozhichigewin, naaknigewin, zhitoowi-naadmaagewin, odamnowin miinwaa inaadiziwin, miinwaa bimoozhigewin.



Wii-oo-zhisidong aasgaabwitaagewin niigaan dazhiike-ozhichigewin.

## ISHKI-NAAKNIGEWIN

2016 gii-nso-boongag, Gchi-oodenaa gii-daapnaan ishki-naaknigewin waa-zhinoomowaajin Ogimaan miinwaa Enkiitaagenjin waa-nakamgizwaad piish go 2020 nso-bboongag.

Bezhiig dash maanda nikeying naaknigewining temgad zhiwe Dazhiike-ozhichigewining miinwaa Wijgaabwitaagewining, memdige go wii-zhichigaadeg maamwewi miinwaa gashki'ewzi-dnakmagziwin, wii-zhitoong wijgaabwitaagewinan miinwaa wii-maawnji-mchaawtoong ondaadiziwin miinwaa zhaabwichigewin.



Wii-shki-naaknigeng wii-zhichigaadeg maamwewi miinwaa gashki'ewzi-dnakmagziwin, zhaabwichigeng miinwaa maamwewizing.

## NONJ WII-GKENDAAGWAG EZHCHIGENG

Aagwiita, Gchi-oodenaa Ogimaag gii-ggwedwenaa'aa wii-aanji-gnowaamjigaadeg ondaadiziwin miinwaa dash go maanda Gchi-oodenaa megwaa dankiitowaa'aan Baagtigong Dazhiike-ozhichigewi-Maamwichigewin (Sault Ste. Marie Economic Development Corporation (SSMEDC) miinwaa go Baagtigong Maandaa-izhichigewin (Sault Ste. Marie Innovation Centre (SSMIC) nonj wii-gkendaagwag ezhchigeng miinwaa wii-waamjigaadeg maamwi gaa-zhi-gchi-wiikjitong.



Nokiing nonj wii-gkendaagwag ezhchigeng miinwaa wii-waamjigaadeg maamwi gaa-zhi-gchi-wiikjitong.



## MAAMWI-NENDWENDAAGWAK WAA-GASHKITONG

*Niibna go gii-tenoon maawnji-  
niigaaniimgag waa-gashkitong  
gaa-waamjigaadeg aa'aapiichin  
miinwaa go gaa-temgag niibna  
nkweshkaagewining.*



Nonj go maangde'aanoon  
nonda gashki'ewizwinan ge  
aasgaabwitaagemgag wii-  
zhitong nonda kina niiwin  
nkweshkaagewinan miinwaa go  
ishpendaagwadoon.



1

**Maamiikwaajmondaanaa  
gdazhiikewininaan**

2

**Aanji-gnowaabandigaadeg  
ondaadiziwin miinwaa dazhiikewin**

3

**Ozhitoodaa  
gdankiitaagewini-ndanegewin**

4

**Maajiishkaatoodaa gchi-gkendaaso-  
gkinoomaagegamgoon**

5

**Wiikmaadaanig e-aandakiiwijig miinwaa  
mno-daapnaadaanig yeshki-dgoshnajig**

6

**Nitamsidoodaa Anishinaabe  
wijgaabwitaadiwin**

7

**Naanaawitoodaa dazhiike  
mino-ayaawin**

8

**Aabziishkandaa  
gnaanaawi-oodewininaan**

1

## Maamiikwaajmondaanaa gdazhiikewininaan

Baagtigong daa'aan ge-zhi-mno-bmaadiziingiba miinwaa ge-zhi-gashki'ewziingiba e-wiikbidood nokiwinan miinwaa go enkiitaagejig. Aabdeg wii-zhitoyiing e-maangde'aag miinwaa e-mjignigemgag dazhiikewin miinwaa waa-zhi-dibaajimong nikeying e-mno-waawijnigaadeg gmashkowiziinaanin, e-mno-gashkitong dazhiike-bimaadziwin miinwaa e-daawemgak gdazhiikewininaan kina manpii aking. Maanda naaknigewin daabtoojiinan miinwaa dasgaabwitaan kina nonda niwin nk weshkaagewinan.



Wenesh dibaajmowinan ge-wiind-  
maageniba kina aking?

2

## Aanji-gnowaabandigaadeg ondaadiziwin miinwaa dazhiikewin

Aanind go tenoon ge-zhi aasgaabwitaageng maajiiging wi nonj gegoo bimindizwin miinwaa go wi sa e-jepziimgak dazhiikewin. Wiji-nokiimdwaag ge'ek dazhiikewining e-togig zhoonyaa (e-nchikewizijig miinwaa go bigo'awayaa) wii-naagdagmowaad miinwaa gnowaamdamaad ezhi-gchi-nokiitmag gda-ondaadiziwininaan da-gchi-wiidookaagemgad wii-maajiishkaamgag maanda gda-zhiikewininaan. Maanda Gchi-oodenaa Bimindizii-Waanj go-Zhoonyaa (EDF) aawan geyaabi bezhig gechi-piitendaagwag nakaazwin. Aanji gnowaamjigaadeg maanda EDF ezhnikaadeg, wdooskaabjigan miinwaa ezhi-biminjigaadeg miigwem sa wi wii-giiknigaadeg ezhi-psikaagemgag miinwaa ezhi-minwaabdag. Naasab ge'e, zhichigaadeg wi Dazhiikewin Ashoojisigan da-ninmaagem ge zhi-zhoonyaakeng miinwaa go ge zhi-ninmaagem zhawenjigewin oodi sa ge-mnwaabjichigaadeg dazhiikewini-nakmagziwinan.

Aaniish ge-zhi-zhitongiba ishki-getnaamz-  
iwin?

3

## Ozhitoodaa gdankiitaagewini- ndanegewin

Gii-dibaatamaang maanda, aaniind go e-aangzhechigejig gii-aangwaami-kidwag wi saw ii-mkowaa'aad de-minik enkiinjin e-yaamjig netaa-doodmajig. Nondan megwaa miinwaa go e-niigaanaamjigaadeg menwezingin daa-gashkichigaade ni wiidookigaadeg gikinoomaagewinan, aanji-gikinoomaagewin, miinwaa go geyaabi aanind nikeying wii-wiikbindwaa nonj eyaamgig nokiwin manpii sa dazhiikewining.



Wenesh ge-zhi-zhichgengiba  
wii-aanji-nokiitmag gda-nagjii-  
wininaanin wii-nkweshkamang  
king nendwendaagwak?

4

## Maajiishkaatoodaa gchi-gkendaaso- gkinoomaagegamgoon

E-maawnji-mashkowziimgak manpii gdazhiikewininaaning aawanooon ne'en Sault College miinwaa Algoma University ezhnikaadegin, miinwaa gwii-wiiji-mno-nokiimdaming nonda gchi-gkinoomaagemgoon wii-aasgaabwiikmang wiinwaa ge'iiinwaa da-ozhichigewininwaa, maajiishkaawiniwaa, miinwaa sawewininiwaa.



Aaniish nikeying ge-zhi-wiiji-nokiimangiba miinwaa ge-zhi-wiiji-zhitongiba gikinoomaagewi-dazhiikewin?

5

## Wiikmaadaanig e-aandakiiwijig miinwaa mno-daapnaadaanig yeshki-dgoshnajig

Wii-dibaatamang nonda ezhgaabwiying myaanendaagwagin miinwaa wii-ni-aawying e-maawnji-maamiikwendaagwag dazhiikewin, aabdeg gwii-nakijigetoonanin waakojitowiingin manpii sa. Aabdeg gwii-nsadwaabinaadaa ezhi-gchi-piitendaagwag aandakiiwin manpii gdzhiikewininaaning miinwaa wii-desi-daapnangid yeshki-dgoshnajig.



Aaniish ooshme mno-daapni-dazhiikewin ge-zhi-aawaangiba?

6

## Nitamsidoodaa Anishinaabe wiiigaabwitaadiwin

Dazhiikewining debendaagozijig gii-mashkotaagziwag wii-niigaaniikmowaad maanda mino-ganoonidiwin. Aabdeg wii-yaamang mno-ganowaamdiwin miinwaa mno-gashki'ewiziwin Anishinaabeg onji, oodenaang ge-endaajig anishinaabeg miinwaa go aabtoozii-dazhiikewinan.




Wenesh dno'oon nibwaachid-winan ge-yaamangiba?



7

## Naanaawitoodaa dazhiike mino-ayaawin

Aanind go manpii debendaagozijig  
nkweshkaanaawaan nagaabnigewinan.  
Maanmwi dash maanda Gchi-  
oodenaa, nchike enkijig, dazhiikewini-  
nokiitaagewinan miinwaa go zhoonyaa  
maangewjig wii-nokiowaad wii-  
intamwaad ne'en nagaabnigewinan  
miinwaa wii-aasgaabwitwaa'aad  
debendaagozinjin wii-gashki'ewziwaad  
mooshkin.



Aaniish ge-zhi-naadmoogwaaba  
aanind wii-waabandamwaad  
da-gashkewizinwaa?

8

## Aabziishkandaa gnaanaawi-oodewininaan

E-jep-bmaadziimgak naanaa-oodenaanh  
gchi-piitendaagwad wii-zhichigaadeg  
ooshme e-wiikjibigemgak dazhiikewin  
onji gonda endaaig miinwaa  
adaawewinan naasaab. Aabdeg wii-  
mino-ganawaabindamang miinwaa wii-  
niigaani-towying dazhiikewini-wiikjitowin  
wii-aanji-bmaadziikmang naa'aawi-  
oodenaa wii-jep-bmaadziimgak manpii  
gdazhiikewininaan.



Aaniish maanda wewe-  
ni ge-zhi-zhiwebkiba piish  
ge-gii-nendmaamba?

\*

## Akinwaadendamowinan

---

---

---

---

---

---

---

---

Aaniish ge-zhi-nokiitmaamba  
wii-gashkitowaanh nonda gashki-  
wewzwinan?

01 02 03 04

## Niigaan waa-zhinaagwak

Ooshme weweni dbaadchigaadeg  
nonda aangwaamitaagoziwinan  
tenoon omaa mooshkin  
wiindamaagewining miinwaa nda-  
gaasmitaagemi wii-ginjigaadeg  
mooshkin wi wiindamaagewin.



*Aagwiita dash nonda waa-gashkitong, tenoon aanind  
aangwaamitaagoziwinan e-zhi-bgosendaagwag zhiwe ne'en  
niwin nikeying nkweshkaagewinan miinwaa go gii-mno-  
waawiinjigaadenoon.*

*Gonda E-nookiitmowaad gii-toonaawaan niigaan waa-ni-  
zhiwebag manpii niwin nikeying nkweshkaagewinan mii  
dash miinwaa gii-zhitowaad aangwaamitaagoziwinan gaa-  
shkwaa wiiji-injindamowaad, aangwaamitaagoziwinan ge-  
naadmaagemgag wii-gashkitowaad waa-ni-zhaawaad.*



## NIIGAAN WAA-ZHINAAGWAK : 01

### Onadiziwini-maajiishkaawin miinwaa Bezhigho-ganowaamdiwin



*Baawitigong da-nsadwaamjigaade e-gkendaasoomgak, myaajiiging, maawnji-nishing-bmaadzwin dazhiikwewin e-yaawang endaawaad maawnji-nishingin yaangzhechigewin, bemaadziimgak indagkenjigewin miinwaa mno-maajiishaawi-gchi-gkinoomaagewigamgoon.  
Mii dash wi, gdazhiikewininaan ge-onji-wiikomaawaad neta-zhichigenjin miinwaa zhichiganan, miinwaa go da-aasgaabwitaan meshkoziimgak daawe'ii gaataaying kina gegoo temgak.*

## AANGWAAMITAAGOZIWINAN:

### Biinjna nji maajiiging

#### OB-01

Biinjna nji maajiiging da-aasgaabwitaawaawaan ne'en megwaa etegin daawewewinan wii-maajiiging miinwaa go ishpjiindamowaad ne'en daawe'ii gaataaying kina gegoo temgakin mzhawe dazhiikewining. Temgad go omaa ge-zhi-gashkewizingiba to gashkitong GDP ezhnikaadeg miinwaa zhoonyaa pii naadmowindwaa zhaazhi etegin daawewinan miinwaa waa-zhi-maajiishkaatong gegoo temgak wii-ndoodaaweng ngoji zaagjiying Baagtigong miinwaa manpii Algoma aking ezhnikaadeg.

### Gchi-gkinoomaagoziwin

#### OB-02

Aasgaabwitaandaa waakjitowaad kina gchi-gkinoomaagegamgoon wii-zhitowaad shki-gkinoomaadwinan – gaa'ii gwa ooshme gchi-gkinoomaadwinan – miinwaa wii-wiikbinaawaad eknoomaagzinjin zaagjiying omaa dazhiikewining.

#### OB-03

Gaazmindwaa miinwaa aasgaabwindwaa wii-maamwi-nokiidiwaad nonda gchi-gkinoomaagegamgoon ne'en sa minwewiziwinan wii-zhitoong ntaa-nokiwin ani-akiwang



## AANGWAAMITAAGOZIWINAN:

### Waasmowni-gkendaaswin Wiindmaagewin

#### OB-04

Gaasmindwaa gda-gchi-kinoomaage-wininaanin wii-zhitowaad gkinoomaage-winan e-mooksegin dbishkoo go naa kina gegoo waasmowin nikeying gnawenjigaadeg, Maawanji-gkendaasowin miinwaa nsing-nikeying wii-zhinaagwad mesnibiigaadeg

#### OB-05

Wii-ni-aabjiikigaadeg gashkitowinan wii-zhichigaadeg damnowinan wii-temgak omaa zhaazhi etegin dazhiikewin meshkowziimgakin

#### OB-06

Wii-zhitoong maawanji-nishing waasmowni-sabiikewin nakaazang sa wi maawnji-wewiibbidemgag waasmowni-sabiikewin skaabiignigaadeg manpii Ontario ezhnikaadeg miinwaa go weweni e-maawnji-aabjitoong maanda sa waasmowni-sabiikewin to daaweng miinwaa wii-daaweng kina aking

### Kina aking Bebaabimaadiziiwin

#### OB-07

Wii-zhitoong ishki-ingoji bebaabimaadiziiwini-aabjitaawin miinwaa aabjichiganan dazhiikewining miinwaa go gaataaying

#### OB-08

Wii-nindowaamjigaadeg ishkiyin gendnadaaweng wii-awenaamjigaadeg gdazhiikwewininaan miinwaa go gaataaying aki wii-awenaamjigaadeg wii-bidgoshnang

#### OB-09

Wii-aasgaabwikamang wii-maajiiging maanda Agawa Canyon Tour Mashkodedaabaan ezhnikaadeg miinwaa go Searchmount ezhnikaadeg

#### OB-10

Wii-nindowaabinjigaadeg UNESCO waa-nji-zhichigaadeg manpii Gchitwaa-Maanii Ziibiing

### Anaandawi-gikenjigewin

#### OB-11

Wii-ozhitoong anaandawi-gikenjigewinan wii-zhiibaa'aanjigaadeg e-mookshkaamgag ni'iing noojimo-naadmaagewining, waasmowin, miijim/gitigewin, miinwaa I.T. ezhnikaadeg

### Baabaamizowin onachigewin

#### OB-12

Wii-ozhitoong anaandawi-gikenjigewinan wii-zhiibaa'aanjigaadeg e-mookshkaamgag ni'iing noojimo-naadmaagewining, waasmowin, miijim/gitigewin, miinwaa I.T. ezhnikaadeg





*Baawitigong da-aawan meno-daapnigewin miinwaa maamwewziwini-dazhiikewin ngoji kina gwaya gchi-piitendmind miinwaa minaadendmind, ayaang wi odaapnigewin weweni bimaadizing, mooshkin wii-dgo-wiidookaaged kina ezhi bmaadizing dazhiikewining, miinwaa gashkitood wii-gkendang mooshkin gezhi-gashkewizipa.*

.....

## AANGWAAMITAAGOZIWINAN:

### MG-01

Wii-bangiiwagichigaadeg minik be-maadzijig e-nagaazjig noondaash wii-temgak maamwi kina eyaajig pii 2027 nso-bboongak.

### MG-02

Wii-mshkowiziichigaadeg e-zhi-wijgaab-witaadwindiwaan anishinaabeg miinwaa idazhiikewiniwaa.

### MG-03

Ooshme wii-yaawaad ge'ek debendaag-zijig dazhiikewining e-mooshtoojig sa Baawitigong ayaangwaamigak, mno-daapniding miinwaa maamwewizing yaasgaabwitaagedmowaad mno-ayaawin.

### MG-04

Wii-baashjiikgaadeg ishpi-igkendaasowin e-nsadwinaagwagkin myaajiiging miinwaa onaachigewin onji abinoojiinyag miinwaa eshkiniigjig.

## NIIGAAN WAA-ZHINAAGWAK : 04

### Inaadizii-gweshkwaadiziwin



*Baawitigong mino-waawiindaan wdoo-gweyaakwaajimowin, owiyaawinodan miinwaa inaadiziiwin, miinwaa nonj bebemkaan nisadawendaagoziwinan, ni-aanjinaaktood gchi-oodenaa wii aawang gechi-shpendaagwak inaadiziiwin maamwewzing, gagkina go, wii-wiiji-wiidookaageng zhiwe panego ni aabji-gnowaamjigaadeg miinwaa maajiiging wi sa gwetaanaabminaagwak bmindizwin.*

.....

## AANGWAAMITAAGOZIWINAN:

### IG-01

Wii-zhitoong Gchi-oodena-moosh-kin nokiiwin waa nokiitang miinwaa waa-aasgaabwitang nonj gegoo inaadizowini-danakmigoziwinan.

### IG-02

Wii-oshkizhichigaadeg maanda Gchi-oodenaa Inaadizowini-naaknigewin miinwaa wii-zhitoong wi Inaadizowini-Naaknigewin.

### IG-03

Wii-zhitoong Gchi-oodena-moosh-kin nokiiwin waa nokiitang miinwaa waa-aasgaabwitang nonj gegoo inaadizowini-danakmigoziwinan.

### IG-04

Sawe'aajmong gda-Gchi-oodeninaan awang nendwendjgaadeg ge-nji-zhiton-giba mzinaateschigewinan miinwaa go waasmowni-nikeying ezhchigaadegin.

### IG-05

Wii-naadmaageng miinwaa wii-dgo-nokiimding ezhi-wiikjitong wii-zhingid miinwaa sawewaajmongid gonda e-inaadizowini-danakmigoziwijig.

### IG-06

Wii-mno-daapnigaadeg inaandizii-maandaa-zhichigewin miinwaa gchi-mno-gashkichigewin waawiindag-inezing nonj gegoo inaadizowini-danakmigoziwinan miinwaa miigweng waa-nji-mnotaagozing miinwaa waa-nji-ninaa-wi-gkinoomaagozing.

## NIIGAAN WAA-ZHINAAGWAK : 04

### E-zhi-bimaadziikagaadeg kina eteg aking



EK

*Baawitigong da-nsadowaamjigaade e-niigaaniimgag bimaadziikang kina eteg aking miinwaa Bkaan enkaazang nyaadmaagemgak wii-bmaadizing e-niigaanziimgak mno-bmaadziwin wii yaajigaadeg nakaazang bgoji-bimaadziziwin miinwaa maawnji-nishing bagidanaamowin, azhazhki, miinwaa nibi.*

.....

## AANGWAAMITAAGOZIWINAN:

### EK-01

Wii-zhitoong sa wi miziwe Dazhiike-Yaab-jichige-Naaknigewin wii-mkigaadeg ishki-aabjichiganan zhaabwichigewinan, nakaazwi-aabjichiganan miinwaa zhaabwichigewinan.

### EK-02

Indagkenjigaadeg wii- zhiibaagbijigaadeg megwaa Gchi-oodena aanji-aabjichigani-nokiwin.

### EK-03

Wii-ndagkenjigaadeg wi e-naaknaage-waad ge'e Ezhi-bmaadziimgak ggwej-to-zhichigewinan Enkiitaadojig ooshme kina dazhiikewin wii-nkweshkigaadeg.

### EK-04

Wii-ozhisijigaazwaad waa-nookitmagig zhiwe anokiwinan miinwaa e-maawandogaabijig megwaa e-nakaazijig bkaan enkaazang nyaadmaagemgak wii-bmaadizing wii-ndagkenjigaadeg neniizh go wii-zhiibaagbijigaadeg miinwaa ishki-bkaan enkaazang nyaadmaagemgak wii-bmaadizing

### EK-05

Wii-naagdawendjigaadeg miinwaa wii-gaazmigaadeg maajigwin gti-gaani-zhichigewin miinwaa wii-aasgaab-witong wi Rural Agri-Innovation Network (RAIN) ezhnikaadeg ni-zhitoong wi Maawnji-nishing Maawanjidiwin wii-bmaadziimgak Giiwedino Gitigewin.

3,2,1

## Mii sa wii-maajtaang.



Bayatenaagwad dash nendwedmang aabdeg wii-zhichigeying wewiib wii-daapnamang sa wi nokiiwin nendwendaagwak wii zhitoong ooshme wii-gizhiiwaaskodeg maanda Baagtigong. Nonda sa waa-ni-gashkitong miinwaa go e-dgosing aangwaamitaagoziwinan ezhbiigaadegin omaa mooshkin wiindmaagewining miigwem dbaajmong waa-zhi-nkweshkigaadeg miinwaa niigaan wii-ni-zhaang. Gbeyiing go da-njitaamgadoon, wiikjitaamgadoon miinwaa go gchi-piitendaagwad wii-mno-daapnamwaad ge'ek sa e-nendgig wii-zhiwebag miinwaa go kina dazhiikewin. Daa-gchi-zhiwebad gp giizhpin bemaadzijig wiidookaazwaad miinwaa nokiiwaad naasaab gegoo kina gwaya dazhiikewining

: wii-zhawendaagoziwaad. Gegeti dash wii gwa miinwaa  
: ne'en ggweji-ngaabnigewinan Baagtigong yaamdang  
: aabdeg wii-nsadwaamjigaadeg, ni'ii ge gwa aabdeg wii-  
: mshkowaajmotaageng wi sa gdazhiikewininaanh ji-gashkitood  
: wii-yaang zhawendaagoziwin miinwaa meshkowziimgak  
: niigaan ayaawin. Nonda inaabwinan miinwa gashkichigewinan  
: ezhbiigaadegin manpii maziniganing daa-gashkichigaadenoon  
: miinwaa ndi-inendaamin go wii-gashkitowaang.

*Mii dash go, ndi-wiindmaagemi wi sa  
: dibendamowizi-zhichgewin aawanoon nonda:*



Gchi-oodenaa Ogimaak  
da-ggwejmigaazwag  
wii-biindgadmowaad  
naaknigwein ni'ii go naa  
yaawiwaad e-nendgig wii-  
zhiwebag miinwaa mii'aaw  
bemoodoojig naaknigewin  
wiinwaa Gchi-oodenaa  
maajiidmowaad ne'en Deputy  
Chief Administrative Officer  
of Community Development  
& Enterprise Services  
ezhnikaazninjin.

: Da-miinaa'aan dazhiikewi-  
: wijiwaagniwaan wii-  
: gigwedwewaad wii-  
: daapnimwaad miinwaa  
: wii-biindgadmowaad.

: Dazhiike-waawye-doopwin  
: (CRT) daa-zhichigaade  
: wii-gaandnamwaad  
: yaabjitaamgag  
: wiidookdaadwin miinwaa wii-  
: nokiitmowaad doodmowin  
: kina ngoji. E-gaachingin  
: nokiiwini- miinwaa  
: ndagkenjgewi-maamwezijig  
: daa-zhichigaadenoon  
: wii-dgogaabwiwaad  
: debendaagzijig CRT  
: miinwaa gechi-gkendmogig  
: dazhiikewining.


: Enso-ngo-bboon  
: wiindmaagewin da-  
: zhiitaawchigaade  
: miinwaa da-ningaade wii-  
: kowaamjigaadeg miinwaa go  
: wii-wiindmaagewaad ezhi-  
: maajiishkaamgak piichin.





3,2,1

## Gegkendmang



1

*Ngigkendaanaanh go ndazhiikewininaanh ayaawaawaad neta-nindwaamjigenjin miinwaa netaa-nokiiig bemaadzijig, ge'ek e-zhiitaajig waa-wiiji-nokiitangig miinwaa waa-miigwejig wenjishing nikeying.*

2

*Ngigkendaanaanh go mnaamewziyaang Yaaying sa ngoji temgag maawanji-dbendaagzii'endmowin, wi sa enjbaamgag enikiikmagaag, gweyekwaajmowin miinwaa gaataawkmagaag.*

3

*Zhitoong wii-ninaawiseg, bmiikmowaad zhichigewinan miinwaa naaknigewaad gaa-zhi-dazhindmowaad ne'en niiwin nikeying nkwehkaagewin, ndebweyendaami go Baagtigong wii-gashkitoomgak zhaabwiiwin miinwaa penmandaadi zhawendaagoziwin.*

3,2,1

## Wiidookaazog



*Mkadewaaboo noojbidoon, wiiykiweniig ge'e, mazinigaansan miinwaa mazini;igan, wii-waabindaman aaniish minik nikeying ge-naadmaagemba ooshme wii-nishing ani-nakiwang maanda Baawitigong (miinwaa go giin).*

---

---

---

---

---

---

---

---

---

*Begish naa ji-gnoozhyaang manpii* [Futuressm.com](https://Futuressm.com)

**Futuressm.com**